

甘泉鄉人稿

甘泉鄉人稿卷十二

嘉興錢泰吉輔宜

書世系譜後

族之盛也豈特仕宦科第哉在四民各執其業而已矣  
士之子恆爲士農之子恆爲農工商之子恆爲工商固  
也卽士爲農農爲士工商爲士農要亦不失爲士農工  
商之人至不士不農不工不商欲族之盛何由得也吾  
錢之爲錢也始盛於明正德嘉靖之間今三百年矣子  
姓蕃殖世世食德綿綿延延至於今不絕聞諸長老言  
蓋未有不專其業者業專則生遂生遂則心純邪僻之

念無自起修其身而誥誠其子孫以孝弟之事達而在  
上有用於國家窮而在下無忝乎祖父胥自專其業始  
今吾錢之人蓋益眾矣問其業農爲多士次之工商又  
次之而不士不農不工不商之人亦往往而有嗚呼其  
誰之責與泰吉年三十矣無所成就蓋深懼其業之不  
專因書以自警非敢爲族人告也

清芬世守錄跋

清芬世守錄者蓋紀

天恩祖德而作也首六卷恭錄

聖製

賜題

賜藏卷冊以及石渠寶笈儲藏之品仰見

聖天子優禮儒臣

褒榮賢母雖虞陞賡歌漢廷題像未有若此之遭逢也  
後二十卷敬錄四百年來十餘世之翰墨名公鉅儒騷  
人墨客之題詠雖一家懿美而官箴世範朝廷掌故  
藝苑叢談往往而在於戲我先人所以上結

主知爲海內推重者不徒文字之末務而卽此以觀亦  
可見其大概矣泰吉懍過庭之遺訓聞長老之緒言搜  
訪二十稔編纂成集以視宋韓氏尤氏之舊話竊不自

揆以爲過之族之人熟讀先世傳稿 國史列傳私家  
狀誌旣知立身立政之大端參考於是編而繹思清芬  
之義以無負

天語勸勵焉則世世子孫所以報

國恩而承先澤者其何如哉其何如哉

六世祖妣鄭太夫人補末傳跋

此明天啟七年丁卯之歲八月朔日我六世祖孝廉紫  
芝府君配鄭太夫人爲諸子析券也府君嘗有初傳中  
傳序是年七月府君謝世太夫人於悲哀中述府君之  
意以訓諸子故曰補末傳當時五房各執其一今第三

房一庵先生支下所執尙存而泰吉得於第四房若庵先生元孫簡華叔榮昌所上距析券時二百餘年我府君支下已傳九世矣太夫人爲端簡公女孫南京刑部郎中平泉先生履準女母沈夫人有婦德府志列之賢母者也我世父艮齋先生嘗見太夫人家訓殘版十餘字於半邈族人所求全書不可得今乃得此補末傳之文想見太夫人教家訓子之意可不寶歟太夫人之訓曰自今以後兄友弟恭母欺小母抗大尤不可聽婢僕之讒以起釁骨肉時時如父未亾刻刻如患將至各奮志立名勵精守業則外侮自消家聲丕振矣於戲約先

儒家訓之旨爲數十言而傳之二百餘年世世不失舊業不外乎此後此數百年苟能世世不失舊業亦不外乎此可不寶歟道光四年歲次甲申五月之朔第五房支下六世孫泰吉始得謹藏其後十年重裝敬跋

五世祖鶴庵府君墨蹟跋

五世祖鶴庵府君官西安教諭時雜蒔花木吟詠以自怡有忘憂草竹垞朱先生爲之序今全稿失傳此手蹟二十首先君子謹藏篋中以畀泰吉合之族父竹泉先生及從兄藹人所藏互有詳略已謹著於清芬錄中嘉慶庚辰新篁里張叔未解元見贈惠山泉詩墨一幅合

裝成冊其後十年叔未更贈府君所題陳太夫人花卉  
冊十幅念先澤之遺感良友之惠敬識冊尾以諭後人

五世祖鶴庵府君贈宛平相公詩畫冊跋

宛平王文貞公撰錢氏疏草序舊家譜所錄失後半篇  
衍石兄儀吉撰藝文略時未見其全不知疏草爲鶴庵  
府君撰集也泰吉初至海昌適文貞元孫百期進士願  
爲知州假讀青箱堂集乃見全文歲丙申得鶴庵府君  
贈文靖相國畫竹詩冊敘述侍御公與文貞交誼及府  
君赴會試時文貞話舊情事頗備時百期已告歸改補  
宣化府教授今且下世惜不獲與之讀此冊也百期爲



文貞子貴州巡撫燕之曾孫桐叔太守如珪之孫桐叔先生宰海鹽時輯續圖經鹽邑藝文續編泰吉亦從百期假讀吾錢氏撰著採錄爲詳府君詩中有序我數世抗諫書之句因錄文貞序文於冊後并詳述兩家世講之好以告後之讀府君詩畫冊者

高祖廉江府君遺詩跋

康熙庚辰上巳盛匏仲先生創詩社於匏庵招同人看藤花各賦五言律四首會者王君之綱李君含漢吳君洽張君鏌沈君鴻與宜山居士匏仲先生凡七人遂以竹林名其社相約必砥礪名節終始不渝乃許入社倘

如靈運之心雜則謝絕之其嚴如此是年六月六日集

敦古堂和藤花詩韻先高祖廉江府君始與焉爲竹林

第三集自是至甲申八月共五十集

府志竹林唱和詩集六卷康熙庚辰

至己酉今所見本止五卷無乙酉年詩宜山稿中有竹林六十七集賦得四月清和雨乍晴詩不記年月當在

後乙酉府君或以出遊或以村居不時至今見於唱和集

者凡十八集得詩二十七首先是數年宜山門人刻辦

香庵唱和集府君亦有詩其後宜山更有南池詩集爲

丙戌丁亥戊子唱和之作未見傳本不知府君與焉否

府君嗜山水少事遊歷渡黃河登泰岱窮龍門積石覽

終南之勝又嘗踰嶺嶠探武夷三洲之奇所遇神仙窟

宅靈景秘跡輒移日不忍去晚年不憚采石牛渚之險  
訪友於姑熟郡齋邁疾而卒遺稿散佚末由考見當日  
交遊之盛卽中歲渡江省親時所著寒江歸棹詩海鹽  
續圖經謂慕思悽惋不減蓼莪之什者今亦不可得見  
泰吉嘗從沈雲泉丈得府君和匏仲藤花諸作謹藏篋  
笥二十餘年矣歲甲午於中錢怡永堂見族祖友陶先  
生手錄雜冊中有選鈔竹林倡和詩始知前所錄府君  
詩皆唱和集中之作時雲泉丈已下世欲觀全編不可  
得今年沈小湖侍郎假歸急請於侍郎發雲泉丈藏書  
得竹林唱和詩五卷瓣香庵唱和詩四卷乃摭拾詩社

本末於府君遺詩後并附錄竹林公約及記序之文與同社諸先生姓名以著吾鄉百餘年前人文之盛要約之嚴而宜山匏仲兩先生蜚遯高風亦可想見云侍郎更示以張氏慶燾所刻辨香詩匯二卷沈氏鴻所輯辨香詩鈔二冊無卷數中有偕府君吟咏之作亦附錄焉文端公撰盛高士傳謂有匏庵集十二卷今僅見村居百首道光十有七年歲在丁酉長至後三日泰吉謹識

直廬問寢圖跋

嗚呼泰吉之幼也先大夫手是圖而授之曰小子不及見先人寶是圖也如見先人矣又詔之曰文端公康熙

六十年辛丑入翰林迎養太夫人於京邸憶童時太夫人教督之勤作夜紡授經圖繫詩五解後蒙

高宗純皇帝御題小子敬誦之亦既知

天恩祖德所自來而太夫人之教及公所以報太夫人者胥不能忘矣太夫人居京師三年思瞻掃先人墓廬公請假侍歸旋入京而太夫人畱南中者十年雍正十三年正月公以侍講學士視學畿輔

上許於試事竣後給假省視太夫人間

命卽馳書與公曰

上恩良厚而官守未可離吾雖衰行將就養公具以奏

蒙

溫諭優荅九月太夫人至京師時公入直

內廷非按試得在京供職是冬擢通政使司右通政在京供職爰屬王君肇基繪直廬問寢圖初太夫人之課公讀也贈光祿公省親信安公十歲公弟主靜公八歲曉村公五歲三人同受經康熙戊戌贈光祿公謝世主靜公以哀毀卒曉村公自雍正己酉宦於陝不得來京師太夫人俛仰今昔中悒悒不自得而主靜公之歿也東原公年尙稚公撫之至於成時亦與東麓公諸弟昆侍太夫人京邸下直時問安視膳怡怡如也太夫人意

稍解公至是蓋亦極天倫之至樂矣明年正月公以試事出京三月初將按試永平七日太夫人壽終邸第後公時時爲諸孫道太夫人生平且言未弱冠遊學他所逾年乃歸席未暖又出門通籍後迎養盡歡者前三年後僅數月耳語及此則悲不自勝吾習聞之小子守是圖而公之所以喜所以悲者可不思乎抑吾則更有悲焉者我考安叔府君年十七卽世後數年吾始生甫彌月本生考旣齋府君請於文端公育我於貞孝馮太宜人所爲叔父後嗚呼吾生也晚今得見我考之顏色亦惟此圖是賴小子其并誌之泰吉臨聆之不敢忘嗚呼

言猶在耳先大夫見背十年矣嘉慶十有九年甲戌歲七月屬兄子昌齡記其後俾吾錢氏世世子孫見是圖者如見先人因以先大夫之所以詔泰吉者謹詳述焉圖爲吾叔高祖文端公雍正十三年冬官通政時所作公前行隨公後者爲公從子東原公攜手行者爲公第三子安叔公執茗椀者爲公長子東麓公攜手鑪後行者爲公次子旣齋公東向立堂前者爲公繼配俞夫人牽衣右顧者爲公第四子依雲公西向坐閣中者爲公母陳太夫人圖無題識嘉慶十九年七月己丑朔公會孫泰吉屬族子昌齡謹記其後俾後



人永保守焉

學山兄希憲嘗語泰吉曰侍太夫人於閣中者爲主  
靜公配節孝任太夫人及東原公配屠太夫人子壽  
文中失敘當補識於後泰吉謹記

文端公自錄詩卷跋

乾隆丁卯文端公爲江西鄉試正考官還 朝時於西  
安舟中遇海昌鳳喈查公錄榜發後登明遠樓詩以寄  
其弟傳初先生蓋旣喜查公與吾本生祖安慶府君同  
舉南北鄉試而又惜傳初先生之未得同舉也先生哲  
祠笠亭翁藏之數十年不輕示人泰吉雖相從久未獲

見也今笠亭翁甫下世乃得於市上可慨已笠亭翁名  
潞乾隆癸卯舉人選授玉環訓導不赴職終老於家傳  
初先生名鳴昌乾隆壬午順天副榜後官同知鳳喈公  
名虞昌乾隆甲戌進士由部郎出守池州我世父良齋  
先生外舅也今讀先公自跋稱爲鳳喈甥則知兩家爲  
舊姻矣世父嘗語泰吉曰爲主司者不可不讀先公丁  
卯榜發後登明遠樓詩爲舉子者不可不讀先公答應  
科目諸生詩兩義相成而內省之道備矣今年學源兄  
嗣子銘恕初應鄉試被斥旣得此卷以付銘恕因敬錄  
答應科目諸生詩於後俾知副知之難而攝志甘寂寞

以求所立與可知端在信修之不已也先公教之矣道光乙未十月下浣

文端公錄耕織圖詩跋

三則

乾隆二十二年

聖駕南巡先曾祖錄趙子昂耕織圖詩二幅於煙雨樓  
卽蒙

題句自後

聖製詩屢及之四十五年

臨幸煙雨樓曾祖下世已六年

聖製詩一讀錢家書趙句愴然不忍更徘徊卽指此二

幅也道光庚戌九月上元朱郡丞重裝於嘉興縣齋泰  
吉敬念先世舊事感泣謹記

樓中尙有曾祖恭錄

聖製罇鐘銘特磬銘二大幅泰吉三十年前曾得敬讀  
郡丞檢尋未得謹附記以告典守者

右二則錄耕詩幅

道光庚戌秋上元朱郡佐重裝先曾祖文端公所錄趙  
子昂耕織圖詩二幅仍藏烟雨樓郡佐宰吾邑建四忠  
祠清芬祠脩曝書亭續梅里詩輯大都以表彰爲勸戒  
此亦一端也重九後一日泰吉謹識幅尾以諗後人

一則錄織詩幅

文端公永慶大橋碑記跋

此爲文端公集外文公中年楷書尤不易得上石後墨本爲族人寶藏泰吉少時曾見於族兄葦塘文學處閱四十年從孫馨山得以畀泰吉重裝謹藏焉橋圯而碑失所在墨蹟僅存衍石兄序余所纂海昌備志謂金石雖壽不如紙堅於此益信橋南關帝廟公有募脩引爲晚年筆亦集外文也泰吉謹錄於陳太夫人畫關帝像之上方語詳跋尾

文端公募脩永慶橋南關帝廟引跋

文端公雍正四年永慶大橋碑記及乾隆三十七年募

脩永慶橋南關帝廟引皆集外文也記有石刻秦吉三  
十年前曾見豐碑植立於廟北桑田中橋圯將十年碑  
亦爲人移置損壞不得見公手寫墨本存族人處從孫  
馨山得之以畀秦吉關帝廟在我祖居中錢村之塘口  
不知建自何年公募脩引云二百年來俎豆維虔又手  
識引文後云祖父以來五世受神之恩則當創於明之  
中葉矣陳太夫人繪關帝像爲康熙辛丑六月文端公  
小時患頸瘡幾殆禱於神感異夢翼日而瘳辛丑爲公  
登第之年蓋畫以答神貺也秦吉亦於三十年前見族  
人供奉於中錢村之懷德堂道光庚戌繼賢姪承志奉

以昇泰吉因與橋記墨本並藏焉俾瞻禮神像者讀公  
之文以見太夫人作畫之不偶然也今歲子仁姪廷壬  
於舊篋中得公募脩廟引稿乃敬錄於像之上方方永  
慶橋初圯時眾議重建難之歲丙午子萬姪寶惠告於  
郡守將力任勸募未幾子萬謝世歲屢荒迄未成廟亦  
頽廢甚未有議脩者泰吉衰老不克任事言又不足爲  
鄉里重繼先人之志以敬共明神利濟病涉者詎無其  
人耶謹以俟之耳咸豐癸丑六月初八日

文端公臨趙書衛生歌跋

文端公所藏趙書汲黯傳秀水唐氏已刻入綠溪山莊

帖衛生歌不知歸於何人間有模本泰吉未獲見咸豐  
癸丑九月二十六日祭掃先塋兒子鬯醕謹持公七十  
八歲所臨衛生歌冊於丙舍同觀公以魯公筆臨魏公  
書腕力之健非弱豪所能彷彿泰吉奉至海昌寓齋依  
式鈔寫一過以略知攝生之方耳非敢云臨仿也公集  
中有跋記收藏本末與此冊跋互有詳略敬錄冊尾以  
備參觀公嘗仿松雪書喜雨亭記付先大夫泰吉得藏  
篋中松雪元本亦未見謹附識之立冬日敬跋

文端公所藏玉枕蘭亭拓本跋

二則

先曾祖文端公跋所拓玉枕蘭亭以貽胡學林翁今爲



叔未先生所藏泰吉已鈔入清芬錄中道光丁酉上元  
前一日過八甄精舍重觀此卷叔未云先公疾篤時曾  
出傳觀沈雲泉文珏與焉此枕本金壇故家物聞將以  
贈文襄相公雲文見此拓本因語其事叔未屬識卷末  
此卷爲胡學林翁之子菊圃丈所裝嘉慶乙亥五月泰  
吉始見於金岱峯處乃知玉枕蘭亭曾爲先公所藏因  
請問於五叔祖芑塘觀察公云少時曾見之後不知流  
傳何所履安者陳姓爲先公鐫碑者也道光丁酉再見  
於新篁里張叔未之齋屬記沈雲泉文語因乞張受之  
雙鈎一本藏篋中今蔣生沐從張氏借此卷將重摹上

石得攜至海昌城東寓齋畱數日默數四十年中凡三見焉今則家之兒童雖不識字者亦得見右軍面目亦厚幸矣咸豐甲寅正月廿八日泰吉謹識

本生祖考安慶府君錄朱子訓學齋規黃陶庵先生自監錄跋二則

右朱子訓學齋規五條黃陶庵先生自監錄六條本生祖考安慶府君手書以付先大夫及仲父贈侍講公者訓學齋規先大夫有跋謹藏篋笥久矣自監錄張叔未解元得於市肆以畀泰吉冊中有蔣生印春雨賞鑒過物印蔣春雨先生曾館於吾家靜讀山房當是假觀未

歸蔣先生歿後幸爲叔未所得也

乾隆丁酉先大夫跋安慶府君所書訓學齋規時年二十四始官閩中越六十年道光丁酉泰吉爲學官於海昌已十年年四十七乃以乙未歲所得安慶府君寫陶庵先生自監錄合裝成冊上距安慶府君卽世時已六十四年先大夫見背亦三十三年矣捧誦遺墨如見我祖父面命於一堂也嗚呼可不敬歟先大夫治縣幾三十年事事以安慶府君爲法泰吉今日得與兒子輩誦習於此而冀我後之人稍自樹立者實賴先人清德之留遺也可不敬歟夫大學必自小學始平居言動不苟

而後當官行政乃有實心也則此訓學齋規尤立身之本務矣小子敢不敬戒以思無忝於先人

從祖肖巖先生灌園詩草書後

從祖肖巖公嘗出自傳之文俾泰吉讀之讀未畢公遽掩卷曰是何足道然吾死後誰能傳吾者因歛歔太息會泰吉纂族譜公命之曰勿書吾官但稱嘉興府學增貢生足矣嗚呼公浮沈下僚數十年老而益困公之不得志而言之若此也爲可悲已泰吉嘗讀簡兮北門之詩而疑之夫以孔子之聖猶委吏乘田盡其職門弟子若子路子貢輩亦皆仕於私家而無怨豈以爲利祿哉

亦曰行吾之道而已而簡兮北門之詩人不免於傲且憂而孔子取之何也及觀夫援上者患得患失之態至於不可道而乃嘆詩人之自決而歸於天與夫思不可見之賢者而望其薦之其翛然遠俗之概非樂天知命者不及此方公之仕也文端公門生故舊所在多有而吾宗官中外登通顯者常不乏公非無可援于人乃官江西久未嘗轉一官及爲景德鎮巡檢也又不得意而舍之去去之長蘆候補鹽運司知事需次無日則告歸歸而貧甚十餘年遂不出嗚呼公之不得志爲可悲而以命自安處困而不絀非自樂於天而能之耶公旣聞

居無聊以詩酒自娛酒後輒歌呼嗚嗚以寄意與人游  
雖幼子童孫下至臧獲意所向咸欣然酬對無倦容有  
不合卽輩行相若時據上坐睨視之不爲起以是人多  
樂公之寬和而亦常嚴憚公不敢失禮嘉慶庚辰四月  
奉吉辭公之濟南甫踰月而公之訃至及歸求公自傳  
之文已不可得得所爲濯園詩若干卷一再讀之不勝  
其悲因志卷末使後之讀公詩者庶幾見公之志焉

先府君詩文手稿跋

先府君手書時藝二首乾隆乙未詩一首嘉慶癸亥詩  
二首乙丑詩一首合裝一卷小子泰吉泣識之曰泰吉

嘗聞世父戶部公言府君少時文極宏肆乾隆庚寅鄉試主司以三場不中式落解辛卯病不赴試甲午遭安慶府君沈太恭人之喪乙未服除境甚困遂筮仕閩中非其志也後世父暨兩叔父登甲科府君以剛直不合上官意鬱鬱不得志一日見舊所爲文悉以投諸火而此二藝爲十六歲作安慶府君手澤存焉則屬吾母藏之篋嘗出示泰吉曰安慶府君欲諸子各受一業以成名而時文則尤屬望於吾欲吾以科名顯庶有以報貞孝馮太宜人苦節也吾不能如先人教急於求仕不得已爾小子志之府君服官三十年所宰多劇邑勤於其

職不暇以詩文自娛閒有所作亦不畱稿乙未梅花詩  
猶未筮仕時作偶寫便面爲伯兄所藏讀小序知有二  
首其一不可得嗚呼府君於先人手植花木猶對之悲  
詠不能釋今捧誦遺墨痛何如耶癸亥二首作於大興  
官舍偶錄示泰吉因得藏焉甲子秋府君膺末疾去官  
貧不能歸日課泰吉讀東坡詩以自遣乙丑春與族叔  
東堂先生一桂表兄沈溯濂師方籛徐怡亭師景澗嚴  
仲和姊婿士鈞分韻賦詩府君得草字卽席詩成命泰  
吉錄以分贈同席時府君病甚每握管必二人侍右者  
披左以手按紙始能書常苦展舒不如意紙未半輒止



此詩幸得成稿泰吉謹藏篋笥不敢失又於敗篋中檢初稿并藏焉是時戶部公告歸已有年府君自悲不能歸常常曰吾安得從吾兄上先人邱壠乎故有故園夢常通池塘又春草之句沈夫子誦此詩謂泰吉曰古人分韻賦詩於限字必出奇制勝今以自然得之坐客閣筆矣後府君病日深不能更御几案此詩竟爲絕筆痛哉痛哉泰吉尋求府君遺詩得乾隆癸巳侍安慶府君遊新鄉縣駱駝灣寺五言律詩一首時安慶府君宰其縣手書父子同作之詩付寺僧因得傳鈔詳具泰吉所纂清芬錄又建郡八景七言律各一首乃與同官倡和

之作有刊本又於蒯氏姑所畫百果卷見府君題句云  
一例收成多結果兒童莫漫說酸甜時嘉慶辛酉姑來  
大興官舍畫以乞題府君猶未病頗厭世事有感言之  
也道光六年丙戌既裝潢此卷因覲縷記所聞於卷尾  
以告後之讀府君詩文者六月朔日不肖孤泰吉謹記

先府君芝城八景詩書後

先府君以乾隆四十一年之官福建五十七年改官直  
隸中間一權建安再權甌甯僅見族父毅齋先生閩山  
連騎圖跋文不知是何年右八首爲治縣時作合刻同  
安數人之詩泰吉小時曾得藏本嘉慶己卯屬陳君新

筵依刻本分書府君之詩踰年未成泰吉旋省從父於  
濟南及歸新筵以所錄府君詩畀藏刻本雜置他籍檢  
尋不得矣今編次府君之詩欲著年月并附錄同官姓  
名恍如隔世莫可追憶曩日不能慎藏之罪尙可悔哉  
陳君分書極工亦未能上石也福建通志續志府君自  
閩攜歸者今亦殘缺節錄有關題事者注於下方以城  
池圖案之城西凡三門曰威武曰臨江曰通濟臨江介  
乎二門之間黃華山在城之東北隅光孝寺在城南梨  
山在光孝之東城西水南則置驛及泊舟之所也泰吉  
生於府君宦閩後當日登臨覽眺夢想無從又不得建

甯府縣志一考其圖籍以彷彿策杖行吟之地檢閱通志略知南北耳通志未及者有如我府君之音容邈不可卽矣傷哉讀城西夕照詩當是府君再至建甯時道光二十三年五月二十五日奉吉謹識

先府君隨筆書後

右嘉慶己未四叔父督學閩中過吳橋府君隨筆錄與者是時府君去閩未十年也首言所過夫役之弊未及閩中物產而以不堪供應爲虞府君謹身帥先與叔父相勉勵者雖隨筆偶錄所言則約所包甚廣後之人當奉爲家誡也其中感念故人言之娓娓下至僕隸之微

一善不念焉嗚呼泰吉年十五而孤我府君厚德及人  
之事未能盡知卽此數則可想見萬一云泰吉謹識

先府君與祝蓉渚丈札稿書後

祝貞女洪稚存編脩卷施閣集吳穀人祭酒有正味齋  
集有傳史烈女沈雙湖吏部頤綵堂集有傳王述庵司  
寇春融堂集有書傳後文始爲事略者我族子恬齋方  
伯也祝女之死在嘉慶元年四月四日史女則六月十  
六日先大夫札中有寒風凜冽語當在是年之冬嗚呼  
兩女之死其時同其烈同而祝女辛苦拮据十餘年所  
志不遂誦其遺言有餘哀焉先大夫宰劇縣凡三十年

案牘有牽連婦女者非不得已未嘗召至縣庭謂所以  
保護其廉恥也聞人談貞烈事亟欲表彰蓋素志然矣  
蓉渚丈名懋裳乾隆戊申科舉人後官樂清教諭先大  
夫宰大興時丈猶以會試畱京師過從甚密往還手札  
當不少此札以述貞女事祝氏錄入家乘衍石兄乃得  
傳鈔於子鳳行篋中泰吉因檢所藏諸家文集知兩烈  
女潛德已有闡揚之者然皆在先大夫此札之後嗚呼  
後之人其敬誦之道光二十二年三月四日泰吉錄遺  
稿謹識

舅氏沈味蔗先生錄先宜人詩書後

味蔗先生爲先妣族弟嘉慶庚申科舉人後官陝西邵陽縣知縣乙丑會試後畱京師先大夫方養痾邸舍延課奉吉課暇與先妣論詩輒嘆服因命奉吉錄舊稿數首而繫以跋冬十二月先大夫謝世自是先妣常在憂愁疾苦中遂廢筆墨所成者惟丁卯五言詩一首耳嗚呼先妣所望於奉吉者何如奉吉不能仰慰萬一敬錄遺詩尙忍追憶耶先妣於唐人詩多熟誦病稍閒時時諷詠以自遣遇月夜心神諧適攜坐具倚迴廊以次誦所愛賞詩擊節唱嘆奉吉靜立以聽詩中精微之處不待解釋而循聲按節渙然若有所悟蓋先妣誦詩輕重

緩急曲折頓挫必體會詩人之意而出之卽一字一句  
低昂轉折不稍失也泰吉侍聽既久所獲益者有非尋  
常評騭家所能及矣先妣嘗語泰吉曰古人云讀書百  
遍其義自見又云思之思之鬼神通之非虛語也我小  
時未嘗多讀書稍長欲通文藝取綱鑑讀之茫然不得  
其解注視凝思久之稍稍辨字義分句讀又久之乃能  
連貫一二行就此一二行熟誦研究積至數十百行則  
脈絡漸通矣如是者數月持一冊書循誦不釋豁然開  
朗自是遇他書皆能句讀矣五七言詩雖不煩句讀而  
欲得其意之所在亦豈粗心浮泛者所能索解耶嗚呼



先妣所以語泰吉者如此味蔗先生所謂冥心索解漸至豁然者卽此也泰吉讀書無專精之業有負遺訓敬錄先妣詩附誌於後以冀子孫之能守先訓讀舊書者道光二十三年歲在癸卯五月二十有三日泰吉謹識

族父毅齋先生閩山連騎圖跋書後

元跋錄前

此余與蓉裳弟合幅小照也余自己卯春赴旣齋叔高澶署中嗣經隨任江甯沐陽興化丹徒新鄉無閒寒暑者凡十有六年與諸弟親若同胞蓉裳旣齋叔第二子也丁酉春筮仕閩南招余至署相處又十有一年其間蓉裳一署建安兩署甌甯三署閩清閩地故多山而閩

清又在山谷之中民圃地僻政簡風清邑之所由名歟  
蓉裳第於公餘之暇每約並轡郊原或五里或十里視  
日之早晚酌游之遠近遇有清溪邃谷林木鬱蔭繫馬  
而坐磐石恣眺覽焉其近郭村人因蓉裳三任其邑無  
不識者遙望見之卽從石磴捧盤茗來并攜筠籃鮮荔  
或園橋相餉此固民知親上亦卽以見蓉裳所至民懷  
而余兄弟之出入友于此情此景亦不可多得也因繪  
爲閩山連騎圖各存一軸用誌不忘古人連牀夜話此  
則連騎出游情相同也并綴數語俾兩房子弟傳爲佳  
話云嘉慶二年清和月毅齋埔識

毅齋先生與先府君爲無服兄弟少時以文字見賞於文端公安慶公及安慶公宰江南河南皆隨之署中先府君少於毅齋先生十九歲相依若親昆弟府君宦閩時毅齋先生以廩貢生倦於場屋乃舉室偕府君以行爲司出內者十有餘年此圖當在乾隆丙午丁未間毅齋先生五十餘府君三十三四歲及毅齋先生題識時爲嘉慶二年府君官直隸吳橋縣毅齋先生方家居年已六十有三蓋卒前之三年也泰吉不獲見毅齋先生及稍長時時聞府君暨先宜人道毅齋先生之爲人府君每歎宦游而後與世父叔父無幾相見而與毅齋先

生共晨夕爲最久家事政事有疑每就質焉及官直隸  
毅齋先生不能來則招族叔東堂先生一桂族兄亭玉  
純錫至署中暇時相與道家鄉舊事亶亶不倦嘗曰我  
終日勞苦於事苟無族子弟乘閒談諧以爲樂獨居深  
念殊惘惘也東堂先生學行與毅齋先生同府君於事  
有疑亦相質今東堂先生亦下世泰吉所及見與府君  
遊處者無一存焉而不得親府君色笑忽忽三十有五  
年矣嗚呼痛哉道光庚子春日於毅齋先生次孫處敬  
讀此圖跋語竊歎數年來毅齋先生長子林一兄貽毅  
長孫循咳茂才濟相繼而逝先世舊籍散亾略盡先府

君與毅齋先生手札數十通林一兄所慎藏者亦盡失之矣獨此圖幸得無恙乃敬臨毅齋先生手書於泰吉所藏圖後并詳識聞見以告銘恕應溥俾知先人敦睦之道有如此而先府君宦閩時情況亦略具於毅齋先生此跋中當常常尋繹言中之意而敬念勿忘也

叔父贈侍講公陝甘鄉試閱卷簿跋

乾隆壬子甲寅乙卯嘉慶戊午世父叔父季父迭司文柄皆有閱卷簿叔父贈侍講公甲寅陝甘鄉試閱卷簿第一房至十房所薦卷標列字號三場卷評騰去取詳著於字號下簿首標記云通其進卷伍千壹佰零伍本

二場卷共肆千玖伯捌拾捌本額中舉人陸拾壹名額  
中副榜拾壹名木字號上科業經編列此次應歸大號  
合試丁字號伍拾捌卷例取中二名聿左號拾玖卷例  
取中一名聿右號叁拾柒卷例取中一名皆公所手識  
也秦吉與公自寫詩稿並藏有年矣公之嗣孫東來姪  
衣食奔走不常厥居未能付之識此以待其子之能讀  
先世遺書者乾隆壬子貴州鄉試及是年試陝甘皆蔣  
礪堂相國爲正考官叔父副之有黔江並棹秦關聯騎  
二圖從兄裴山爲之序同時諸公多有題詠秦吉詳著  
於清芬錄中圖藏衍石兄所

清安老人錄呻吟語跋

右爲從父清安老人錄呂新吾先生呻吟語以應子仁  
姪之請時年八十有四考終前二年也老人巡撫山東  
時泰吉往省留兩月燈下治章奏定案牘常侍側每易  
一二字必願謂泰吉曰何如且曰幕客執成例以蔽獄  
於 朝廷法外之仁不能通知其意也我下筆敢不審  
慎乎接見屬吏容貌辭氣不少假借而宅心甚和處事  
必恕非久侍側不知也嘗刻呂子節錄以贈人中年以  
後未嘗一日不觀所謂身體力行蓋無愧焉治事之暇  
作書自娛所錄多呻吟語家居十七年乞書者無貴賤

疎戚必應非先世遺訓卽呂子語也道光乙巳秋子仁  
出觀此冊泰吉於從子中爲粗知老人用心者謹識大  
略俾吾家子弟知老成人必有得力之書終身誦習乃  
於修己治人之要不失繩尺也窮達出處有異致哉亦  
勉所持守而已矣

翼堂兄詩集跋

泰吉同曾祖昆弟四十餘人或年歲不相及或從宦遠  
方有終身不得見者而見吾翼堂兄爲最早嘉慶庚申  
辛酉閒兄自河南應京兆試始見於大興縣齋吾父母  
語泰吉曰翼堂敦厚樸實甚似爾長兄也是時吾長兄



學源先生沒已數年兄與學源先生同歲生年二十餘  
余十餘齡耳聞父母言益暱就兄亦甚愛余其後數  
年兄累試不得志將之官閩中泰吉方居先大夫憂侍  
母於家兄來省吾母數日卽別及兄聞繼母胡恭人之  
赴而歸也泰吉除先宜人之喪已有年年已三十餘矣  
當是時叔父觀察公方宦金陵兄家居不數月及再官  
閩中不相見者又十餘年戊戌四月兄除觀察公之喪  
將入都過家甯數月余方司訓海昌僅得一見回憶始  
見兄之時忽忽幾四十年余長子銘恕爲學源先生後  
者年亦二十餘而兄幼子繼文已能編次吾兄之詩出

以示余矣兄宰閩中三十餘年所至有實政僅轉一階而詩益和厚時時作畫以自娛畫成輒題句其上間作小詞語意亦深遠蓋兄之生平以端厚持重爲主與學源先生之遺言適相合此泰吉所以讀吾兄之詩憶父母之言而每見吾兄如見吾學源先生也今兄又將往閩中不知後此幾年更得一見乃敘次數十年離合之故繫於吾兄詩集後吾兄時覽觀焉庶慰別後之思乎夫世之兄弟豈無敦穆友愛終身不暫離者而我同曾祖昆弟今見在者不及三十人皆散處四方近或百里遠且數千里幸而聚者無幾人誦終遠兄弟之詩能無

流連慨嘆也乎道光己亥春分後三日

兄集名竹琴詩稿未入仕時所作古今體詩三十九首曰拾遺集宦閩後爲入閩初集凡古今體詩九十一首入閩二集凡古今體詩一百六十首題畫集古今體詩九十五首附亦醉軒詞集四十五首泰吉附記

兄子監生繼文字識一少倜儻不凡讀書多卓識文筆亦奇偉咸豐三年正月寓家金陵城將破誓不辱令其長子走免手刃其幼子女視其妾自縊乃投河死族人自揚州來者咸言僕某在圍城中數月乘閒

得出述其事甚確實其長子則未知存否余欲爲文表其志節悲慟未能成謹附識之咸豐四年寒食日記

自浙之滇山川行程圖跋

嘉慶十九年寶甫自翰林出守澂江待軒在京師既送之行爲繪是圖并序一通序稱圖二十有二府二十今圖止十九府十七者杭嚴衢皆浙治道路險易耳目所近習故自江西廣信府始六月寄達寶甫時適乞假里門裝之成冊屬泰吉錄待軒序於冊後乃詢於寶甫曰子之行也程途有期所過之地卽欲歷覽名勝不過一

二日畱尙將考其山川察其沿革廢置以周知其風土人情涉江以西則不念先人之宦迹過黔陽且將訪遠祖何公遺裔之興衰況奉

天子命出守於滇率其屬吏爲民興利除害者乎吾嘗考雲南之圖籍見夫金馬碧雞諸山峰嵐秀拔滇池周三百里盤龍江之九十九泉皆合流以入焉山川溘厚之氣鍾於人其民多愿樸能習長上之教獼獠爨僰錯雜而處撫綏得其術亦無異於編氓吾五叔祖觀察茲土也幾十年從父亦嘗視學是邦政治文章滇之人能詳焉因成蹟而擴充之紹家聲展遠猷報最於

天子將於是乎在詩曰墮山喬嶽允猶翕河古者巡守  
所至必信按山川之圖而次序祭之溷之去京師遠  
省方不及至守是土者必有爲

天子宣德意於民而播告山川者矣豈以是圖爲登臨  
覽勝之資也哉

跋几山文學

善揚

畫蘭

族父穉石少宗伯畫派傳次子芋塋明經敏錫明經畫  
不常作有蘭卷同時若趙味辛諸公多爲題詠謂能繼  
宗伯也宗伯晚年畫往往授簡於芋塋長子善揚順甫  
而親爲署款卽賞鑒家不能辨其精到如此順甫晚自

號几山爲人高簡如其父母陳孺人有讀書樓詩稿宗伯以爲可傳力貧訓子嘗爲人鈔五代史得錢製兒衣族黨稱之几山濡染母教終身未嘗妄干人不獨其畫可貴也此幅爲殷雲樓明經作雲樓與几山方以畫相切磋非率爾應酬者雲樓之畫今以老筆見重而几山下世已三十年畫時距今四十年矣其弟善言從几山得筆法今官蜀中蜀人愛其畫几山長子聚英能畫早世次子聚瀛聚朝皆以畫知名聚朝昨歲得鄉舉家學幸未墜云宗伯豕孫恬齋方伯寶甫亦能畫而第五房孫善章厚甫從孫善繼成甫兩文學畫尤工厚甫才侗

儻年未四十而死成甫喜填詞晚以醫自給余少長於京師不及見几山而得與成甫遊族人謂成甫溫雅醜藉甚似几山也道光丙申四月萍南葛君持几山畫扇屬題葛君方輯畫家傳因牽連記之俾世之愛畫者有所考焉

跋冷齋勘書圖

道光丙申張君元爲寫勘書照陳君宗敬補圖余自爲記題詠者數十家別裝成冊五年來又得同人贈畫十六幅總憲桐城姚公八分題額一幅辛丑秋日付裝潢手張之於壁眼前突兀如有廣廈之庇亦打頭屋中一



快事也黃長睿嘗見北齊勘書圖考之宋次道書始知  
畫者楊子華而圖中勘書之人則莫得主名今諸君子  
之畫必有傳於後而余目力日衰學力日減所校書多  
未卒業後之觀此畫者謂爲不知誰何之人宜矣姑署  
里居名字聊以自娛七月旣望嘉禾甘泉鄉人錢泰吉  
輔宜甫識於海昌學官之可讀書齋

甘泉鄉人稿卷十三

嘉興錢泰吉輔宜

查近川先生覺庵存稿跋

近川先生以直諫著聲與先太常公爲道義之友泰吉嘗於查氏文鈔中讀請東宮冠禮講讀議處宗藩參劾左庶子郭希顏妄議廟禮愼名器以重恩典諸疏評者謂當在賈董之列非虛美也辛丑冬日吳惺園明經以所錄書十一篇詩三十七首見示皆拜經樓舊藏爲文鈔及梧岡太守同宗詩鈔所未錄者答趙劔門三書答羅西泉答史沱村書皆論倭事與先太常集中處倭議

諸文參觀可知當日倭變之大略矣夫古今事勢不必盡同然處之得其道則爲俞武襄爲羅西泉者豈無其人否則彼有宿謀我無先備甚且無城不虛無守可固若近川先生所言者豈獨一時之言哉今者海土之事日月滋蔓大府方議嚴守海昌以衛省城則與趙劔門第三書尤爲扼要所宜上之當事以爲講求考鏡之資也

讀祝虛齋先生嘉議堂集雜識 六則

明嘉議大夫廣東參政祝公諱萃虛齋先生遺集十卷前有西涯李東陽賓之序右淙楊一清應簡序雲間張

宏至嘉議堂銘第四卷尾有第七世孫翼康敬輯傳之  
不朽永爲家寶兩行第一卷至第五卷爲奏疏序記碑  
銘祭文書啟第六卷以後則古今體詩及詩餘也

泰吉初至海昌卽拜虛齋先生祠堂從先生裔孫茂才  
鏞假其父富明所鈔嘉議堂集讀之錄存數首自茂才  
下世後其家鈔本不可再覩道光壬寅冬日衍石兄以  
刻本見寄其總目與鈔本無異而鈔本中有與子繼舉  
書二首爲刻本所無有云汝等爲學切宜近裏著已做  
工夫自然有得不患人不知也所惜者汝等處豐裕  
之地無艱苦之可受異日成就恐不及我耳勉之戒之

又云天之作成我太過我若不知止足而厚享之非所以答天也譬之主人愛客罄百味以食之客乃不知自節縱意而食未有不反中其身而成疾者我今適亦類是且處豐裕之地而不能俛焉盡力於性分之所固有職分之所當爲如違天何主人留有餘不盡之飲食以遺僕夫僕夫顧乃輕棄狼藉而不知惜主人將怒目而悔後雖當與亦不與之矣汝曹其細思之能不惕然也哉錫之□□亦其福薄使其爲一貧儒無許多受用未必有此疾當以我言戒之右爲督學關中及擢粵藩後家書處盛憂危著爲家誠真至言也繼皋字師謨嘉靖

癸未進士歷官駕部員外郎初任南豐令居官廉節興  
利除弊爲民請命者不一剏爲火筭行法派征簡便永  
爲江右令則南豐民世祠之許氏縣志云詳建昌府名宦祠志蓋能不  
負家誠云

虛齋先生以宏治九年三月自虞衡司員外郎乞休養  
親時年四十有五家居十九年至正德九年以薦起家  
爲陝西提學副使力辭不許乃之官正德十一年由廣  
東參政乞歸實年六十五文集中乞恩致仕諸書敘次  
甚明許氏縣志名臣傳謂以嘉議大夫致仕時年四十  
誤也

楊公一清所撰集序敘先生生平頗詳可當傳略李西  
涯序皆泛論文章爾集中與喬同年書云謬承邃庵老  
先生起用付以風化之責蓋先生之督學關中楊公實  
主持之相知有素也先生自粵東乞歸上邃庵書勸其  
刪訂禮記及節宋元二史先生有禮經私錄宋元史詳  
節當是乞歸後所撰述惜未見傳本與邃庵書又云正  
學書院志不肖今已就閑行當脫稿所求前序萬乞秉  
筆正學書院志未見

集中與郭邑侯郊書云志書事不宜緩乞先示賦役二  
稿則郭君宰邑時曾脩邑志而許氏縣志名宦郭郊有

傳不及脩志事縣表中亦無之豈爲之而未成耶許黃門雲村集有與泉亭吳維新少參書論脩志事曰我嚴侯明見之審執事直筆之任則當爲嚴侯寬也泉亭名鼎錢塘人正德中進士官至廣西布政左參議乞侍養歸黃門集有墓誌銘不及海昌脩志事嚴侯水利圖志今不可見矣與董碩甫書與蔡松野大尹書則蔡侯脩志時也蔡志余已傳鈔得之

與江少宰書云做縣治農縣丞辜篋居官清慎勤恕三載如一日大得吾民之心茲以裁革赴部適有本縣員缺乞賜銓補終惠吾民幸甚幸甚做縣自知縣邵有道



振作之後風俗頗變近繼以崔尤得治體又佐理得人如縣丞辜篚鄧鈺教諭朱泰皆前此所未有也邵有道久矣沈滯不知何在倘蒙提拔斯實人心天理之公非特海邑之私幸也與王古直云夏間考滿邵知縣回蒙寄書云云敝縣難治爲兩浙首稱賴邵振作章善瘳惡痛快人心且其一廉直可對越上帝但或不能隨時俯仰以悅人人少肯借譽之者士夫每爲之不平與思永同年云敝邑縣丞辜篚改選崇安云在貴治之下辜在敝邑三載清而不激寬而有制事體純熟從容應酬文學政事俱有可觀而將之以不矜不伐殆有吾輩所不

可及者當於古人中求之又送嵇明府還任於潛序云  
海甯自邵侯虞臣更任以來鮮克有繼虛齋先生非妄  
譽人者况屢屢言之如此續脩志乘者當錄諸語於邵  
辜兩君名下以補舊志之闕

讀許同生先生遺稿雜識

三則

同生先生詩文遺稿凡七冊雜編複見無卷數舊藏先  
生族孫沛縣知縣嘉猷所沛縣君與先君子訂交泰吉  
初至海昌請謁卽假此稿至學舍十餘年多病未能卒  
讀壬寅正月排比詮次錄文若干篇析爲卷而識其  
後曰先生爲黃門從曾孫生於隆慶元年丁卯年十七

補諸生

見董夢徵狀

萬厯癸卯舉人丁未進士令上饒秋杪

涖任受事凡十月移無錫

上饒縣重脩學宮建麗澤倉記

丁亥冬爲

淮安教授

海州府君入祀記

壬子分校四川鄉試

王母朱宜人志陳盡臺傳

癸丑冬晉秩成均乙卯冬量移南西曹

俱見隨園記

丁巳以

事忤國子祭酒三月大計劾罷

事詳挂議略及歸途記

歸丁父艱

天啟辛酉謁選得徐州倅四月涖任

啟毛撫臺岱游記

壬戌爲

廷評

司寇生白吳次公諫跋高存之先生遺言

癸亥奉使休沐甲子八月北

上

兩垞記鬱岡山乾元觀記

乙丑六月由大理轉比部楚司郎

又吳見只傳云乙丑爲西曹郎敕吏毋虐囚者

冬槁師榆關

雷比部醵園記平山游記

丙寅出守淮安八月廿七日到任

通淮郡伯啟

丁卯二月初

七日告歸

通來年  
文啟

越五年辛未□月□日卒遺命勿求

諛墓之文故舊志載先生宦蹟甚略泰吉讀遺文次第  
所可知者如此先生倅徐州時自謫通籍十五載兩專  
城左參軍右司李厯內外學博晉爽鳩迄於謫雲龍凡  
八庚爵地見若留記中又言敷厯內外廿年十三任見  
於祭李宗伯文則文集所可考見者猶有缺略也亦嘗  
爲青州理見於莆田陳蓋臺傳中然不知何年其由無  
錫令爲淮安教授當是謫官亦莫知所由俟續考焉

朔假靈泉許氏宗譜讀之錄  
家傳於卷首先生仕履頗詳

先生宰無錫當高忠憲家居時因受知焉及忠憲官大

理少卿先生爲屬官忠憲角巾步訪於小庵辭不敢見  
已而報謁忠憲命奚童奉酒呼盧暢飲數爲先生扼腕  
及忠憲發崔呈秀穢狀引罪歸緹騎往逮自沈池水死  
先生得遺表泣而藏之具詳跋高存之先生遺言天啟  
丙寅三月事也先是一年六君子死詔獄魏忠節忠憲  
門人也楊忠烈左忠毅周忠毅袁忠愍顧裕愍皆丁未  
同年進士吳見只傳謂同籍罹禍者七人先生方官西曹目擊璫禍趣  
司寇澈川吳公中偉告歸見吳次公諫先生旋出守淮安泣  
任未幾亦歸跋存之先生遺言謂丙寅守淮幾入虎口  
祭大宗伯湘翁李老師文云微幸乞骸免屈膝於匪類

保首領於牖下解帶亭記謂此帶在天啟之末玉碎金  
鑠身首異處則有痛心疾首解組而逃者矣由是觀之  
先生蓋幾罹黨禍幸而得歸者縣志名臣傳謂中璫出  
鎮卽日引疾歸爲得其實靜志居詩話謂先生一官不  
達意薄淮陽殆未讀先生文集而爲是言也先生歸後  
屢致書淮郡守言那移輕賚之積困假令臥治能容豈  
必無意於斯民而決然舍去哉

陳君乾初之稱先生也曰公寒時無諂居官無驕在任  
視民如子冰鑒無私歸家一介不取一僕不縱凡里有  
冤情立以公言暴白豈所謂身中清廢中權其古逸民

之流歟泰吉讀遺稿益知陳君之言爲信稿中若與張  
按臺言兌運與張鯤臺言糧役與某按臺言造船答某  
年丈言編審與吳亦臨邑令言竹行稅以及海變後與  
撫臺張華東言築塘救荒通商事所謂以公言暴白者  
也先生之歿也布衣俞君詣郡白先生生平於學使者  
得祀鄉賢先生家人不知也公論臆之俞君名良謨字  
龍淵好陳利弊嘗議甦鹽竈之困豁解役之繁破家無  
怨時南解役猶爲民病俞君與先生議合先生白當事  
未果行而先生卒俞君後數年卒年八十二邑諸生百  
人請於督學肖像配祀於邑令林侯恭章祠蓋官解息

民俞君發之林侯成之也詳邑人金君英所撰事略夫士大夫退歸者足跡不入公府不預戶外事固其宜也鄉里有大利害乃亦不出一言以抒疾困而令閭里憔悴之士發憤慨歎躑躅叫號於長吏之庭不以誣罔爲罪已厚幸矣誰爲聽之而誰爲恤之哉俞君遇林侯得行其言亦當時鄉先生若先生輩羽翼之歟讀先生遺集者若徒歎羨其放情山水樂志田園豈足以知先生哉泰吉讀海昌先哲文之言民生利弊者詳錄之不敢忽亦冀取鑒於來茲爾故於先生遺集著其大凡云

跋陽明山人和董蘿石詩卷



嘉靖丙戌除夕陽明山人手書和從吾道人七律一首  
詩序與道人像合裝一卷前數行不知何時失之後有  
嘉靖己酉嶺南羅江陳珪跋則道人子兩湖先生乞題  
者也其後經亂失之康熙甲子歸董氏云思丙寅仲春  
有吳氏岌跋甲戌秋有查氏嗣韓跋後又失之乾隆辛  
丑陳仰山孝廉攜至京師我族父少宗伯公錄靜志居  
詩話一則併系跋文道光壬寅秋日愛山茂才時春出  
示泰吉則此卷六十年中又流轉而歸董氏矣吳君謂  
神物無恙蘿石實式憑之不信然歎道人始見陽明爲  
嘉靖甲申春明年乙酉陽明爲撰從吾道人記及歲丙

戊除夕賦詩陽明年五十五道人六十九海圍縣志謂  
蘿石年六十八始游會稽者讀陽明記文未審差次一  
年耳其明年陽明卽家起總督兩廣江西湖廣軍務又  
明年平思田平八寨斷藤峽十一月班師道卒道人從  
陽明游蓋不及三年也泰吉少讀道人題先世河源詩  
卷卽深仰企今得瞻遺像又從愛山假讀遺詩因敬錄  
元唱除夕二首及哭陽明夫子詩五言排律一首於卷  
後以見道人與陽明知契之大略筆跡雖劣幸託先人  
之舊竊比鈔胥道人或許之歟陽明從吾道人記文當  
時必有手稿倘神物無恙能合裝入卷否愛山其勤求

之

跋張方洲朱西村兩先生詩畫卷

海鹽張方洲先生以直諫顯朱西村先生以高隱重出處雖殊皆擅三絕實足輝映後先此卷朱先生畫有自題句三絕備矣張先生雖但有詩墨而行楷蒼勁草書飛舞想見清燕堂中清興頓發與集中所述閒居畫記無二致也自署成化乙未秋九月一笑山雪夜歸舟中錄一笑山雪夜歸舟者先生告歸後以七字自題草堂之室也有記見集中朱先生在小瀛洲社會中年最長當嘉靖壬寅實七十有八此畫自署八十一翁則在嘉

靖乙巳以甲子推之張先生錄詩時朱先生甫十一歲耳今裝者以畫居前失其次矣方洲集爲先世所校刊家有藏本惜殘闕卷中爲李使君題張南山畫七古及一笑山以下三絕句與題餘不春社絕句第一首集中均未見題邊景昭畫馬七古及餘不春社兩絕句亦可校正集刻數字西村詩於小瀛洲社集中略窺一二肆中曾見全集鈔本未及購藏至今以爲恨道光乙巳正月從沈雪門洛假此卷展讀竟日雜識於後而歸之

跋黃葉村莊種菜詩卷

吾友石門蔡君硯香近寫四十八歲小像爲戴笠圖自

題云冒雨也思寒菜種家鄰黃葉老人村因裒集老人  
自書種菜詩及同時和贈墨跡鈎摹上石以示希蹤先  
哲之志硯香謂泰吉與吳氏有連少時卽得黃葉村莊  
藏書數百卷寶守三十餘年矣屬贅名於後往歲硯香  
得陸東村先生同時投贈詩篇數十家皆先高祖唱和  
之友泰吉因乞收藏擬與味根從孫聚仁所贈先高祖  
和東村先生東歸詩合裝成冊謹附識於此以見吾鄉  
百餘年前風雅之盛不可磨滅然非硯香寶愛摛集則  
楮墨零落後之人亦徒想聞丰采而已矣篤敬桑梓若  
硯香者亦曷可少哉

潘太史瀟碧亭圖跋

瀟碧亭者海昌潘香士太史結想於無何有之鄉而閩中伊君爲之圖也是時太史以選拔應朝考戊寅中本省鄉試庚辰入翰林未及歸而卒然則所謂瀟碧亭者玉堂耶玉樓耶噫余不獲與太史遊而其弟仲方孝廉交爲深道光甲午太史哲嗣稻孫出此屬題則仲方又下世矣時坐仲方新闢書齋與伊人翁及稻孫昆季談舊事爲之泫然夫寓形宇內者皆自無而有有而無者也所異者久暫耳太史兄弟如電火之倏過而此瀟碧亭者紙墨不敝則兀立於無何有之鄉乃可數百年

稻孫其思所以永二父之傳如此圖矣

葛素如廣文

星垣

剡曲授經圖跋

秀水葛素如先生爲嵎縣教諭既有年弟子著錄者日益眾有子四人執筆迭侍乃爲剡曲授經之圖而屬余識之夫今之學職古博士也自漢制博士弟子通一經者得蠲租賦秀才異等可至大官於是以執經爲祿利之路祿利之心勝而門戶之見生甚至父子異趨如劉歆之於更生可慨已韋氏以詩教授號鄒魯大儒而世亦徒誇其兩世爲丞相封侯而已嗚呼祿利之惑人也如此蓋去孔子之教遠矣昔者顏曾父子同學子思之

學乃得曾子之傳曾申之春秋又受之於左邱氏商瞿  
有丈夫子五乃傳易於馯臂子弓當其時未聞以明經  
爲高位也而聖賢相與窮年兀兀講明而切究之父不  
必私其子子既受之於父又必博習親師以成其業也  
抑獨何哉子夏之弟子公羊氏傳春秋至於五世之久  
而不聞求知於當世嗚呼難矣或曰示兒以利祿雖昌  
黎亦然我嘗取其詩而讀之曰峩峩講唐虞曰考評道  
精粗終之以無迷厥初焉符城南讀書則曰文章豈不  
貴經訓乃菑畚行身陷不義安望多名譽昌黎之教子  
可謂有本有末矣豈必枯槁寂滅而求免於祿利哉又



豈以經訓爲市利祿之資哉余亦忝爲博士下材不能  
通一藝緣發明先生授經之旨以誌吾愧焉抑嘗讀剡  
錄竊有慕乎周氏之闢五齋而梅溪王公爲之師也今  
淵源之堂孔門之像猶有存乎士之講論道德者其亦  
有溫台秀士如當時乎先生之學固上希乎梅溪者也  
他日放剡溪之棹從先生上下其議論圖中諸子必有  
如魯國孔長彥兄弟講論可聽也則我尤願與學者同  
過葛氏矣

陶棣生齋尹

宗輝

靜觀圖跋

萬物靜觀皆自得四時佳興與人同明道程子之詩也

棣生齋尹以靜觀名其行看子而泰吉識其後曰吾人  
日用飲食皆動機也況仕宦而後所事日繁所接日廣  
當其感物而應蓋有求一二時之靜而不得者棣生坐  
松石間曠懷觀覽不以事物撓其心一歲中有幾日耶  
雖然卻外物以爲靜此釋老之學儒者不取也其必動  
與靜互爲根也交相養也處靜之時天機流暢而應物  
之理無不備也順動之時心志明通而默養之功無或  
失也先儒所謂動息皆有所養者乃窮理格物之實學  
也君家淵明性愛閒靜方其北窗高臥嘯詠羲皇似獨  
耽靜趣者而先正嘗謂出則爲孔明處則爲元亮易地

則然惟其時也然則淵明之愛靜與武侯甯靜致遠之旨又何以異由是以談棣生雖所事日繁所接日廣又何日不可坐松石閒曠懷觀覽耶程子謂靜後見萬物皆有生意者棣生必能體驗得之矣尹和靖嘗以鐘聲喻動靜伊川聞之而喜朱子在同安聞鐘聲而悟收心之法昔賢觸境體察蓋如此棣生廨舍與安國寺鄰日夜聞鐘聲其亦靜觀時之一助耶泰吉素無存養之功欲謝外游而務內觀常苦心志之不定也棣生當有以教我矣

爲金岱峯跋桂未谷隸書屏幅

道光庚戌岱峯將自臨安之官溫州叔子蓮生侍行六月初與余同寓武林爲誦少陵故人官就此絕境與誰同句有難別之色既而出新得桂未谷分書慶鴻名頌屏幅謂將張之學舍以爲索居之適蓮生工書窮日力以探討原委父子評論詩文之暇欣賞名跡自晉唐楷法追遡秦漢篆隸品隲高下如課士之等差此樂豈易得哉惜余不得偕耳未谷分書評者謂百餘年來無出其右余非知書者題識數語俾岱峯如與故人相對也

秀水周氏竺橋丙舍圖跋

吾鄉稍有衣食之家恆以過時不葬爲恥富貴仕宦而

感於陰陽拘忌逾久不葬其親者亦鮮此猶爲近古者也然法古族葬而祖孫父子兄弟不別起塋域得如生存之時聚處一堂者亦不數數見今觀辛甫周兄所繪竺橋丙舍圖及讀桐城蘇厚子之所敘述知辛甫之高曾祖父及其從祖祖父從祖父之墓相距半里而近有若望衡對宇然自其曾祖子佩先生始築丙舍踵而居焉者累世矣以耕以讀多在丙舍此蓋數十年來所僅聞者矣余去家已及二紀披圖慨想益思辛甫之爲人於戲辛甫果能充其孝思世世無閒此圖當與昔人墓田之帖並傳於世又豈獨吾鄉之所取法也哉

陸贄香曝書圖跋

陸瓠尊先生所藏書皆校勘精審得一善本丹黃不倦  
晚年猶從余假何義門兄弟後漢書校本過錄余亦從  
先生得錄三國志評點本未幾先生下世所藏盡散而  
贄香能守先生所遺繪曝書圖同人相與詠歌之謂舍  
曝書雜記嘗誌瓠尊先生校書爲知先生者屬識冊尾  
嘗謂宋晁氏所藏書雖千百年後紙墨盡渝而人猶豔  
稱南陽井公所遺者以郡齋讀書志序文詳言之也況  
親承叔父之所授寶若球圖表而章之宜矣余少時世  
父戶部公賜書千餘卷每歲曝書必指示兒輩感念不

忘中若翠巖精舍所刻元文類手校數過差能訂譌正俗其他未盡讀也倘贊香所收益廣取法晁氏之志纂成一編余所得者仿趙氏之附志續編於後贊香其許之乎

雍氏補荆圖跋

嘉慶癸亥通潞雍玉山竹薈兩先生屬吳門黃穀原繪守荆圖以記兄弟同官之樂道光癸卯寓家中牟河決失之歲己酉竹薈先生哲嗣餘堂澁尹重遇黃君爲之補圖餘堂來權黃灣場與余相遇屬爲題之吾人筮仕而後去其鄉里欲與同氣之人如少時牽提笑語之樂

常不可得或幸同仕於時而千里萬里之相隔有數十年不得一見者幸一見之數日而別此古人所以誦對牀風雨之詩而流連慨歎者也然非孝友真摯之情固結於中亦安知相聚之難而必欲垂之久遠哉餘堂之先人仕宦而後得爲此圖不意失之而黃君於四十七年之後又爲重寫非兩先生孝友真摯之情足垂久遠豈易得此非餘堂能以先人之心爲心而真摯之情足以感人又豈易得此余先世有荆合齋嘗欲繪同堂兄弟小像爲荆合圖各處一方不果成今觀此圖益深感歎云



讀徵賢堂集雜識

同里曹種水先生於古文駢體詩詞皆專力爲之皆自成家遺稿甚富此徵賢堂詩正集八卷擬唐宋雜體詩二卷爲嘉善黃霽青太守選本哲嗣稚香明經將授之梓因條繫所知於後

先生詞集已刊行蓋手定本詩文雜著皆於暇日刪削定稿先生館同里胡氏久藹人後卿父子皆從游欲爲先生刻全稿未果余甚惜之稚香先刻選本之詩欲讀種水詩者於此亦可得其大略也

余初識先生時先生方從維揚歸所編紅藥橋集一百

五日集媧紘集假歸屬表兄懷豫堂錄其副豫堂於先生亦中表兄弟也今選本將出而全稿未行竊喜得讀先生詩於四十年前所見略備也

先生自言先人有藏書少卽徧覽及先人下世以償逋負盡失之然手纂之冊已嘗掇其精英矣其後時從友人借未見書且稍稍購置每得一書必手自采輯密行細書日可萬字閱五十年積成數櫃余每過從時時取閱若集中讀水經注詩則親見其纂輯撰著者也先生平生博觀約取力學以昌其詩大都如此

余於先生蓋在師友間所錄少陵昌黎東坡詩評本皆

假之先生嘗共讀姜堯章集先生緩吟昔游詩余靜聽  
移時得有領悟又取陳新筵小楷書白石詩說冊展觀  
細味先生怡然自得余亦胸中渙然不能言也嗚呼先  
生下世有年余衰老失學往時所得於先生者閒中靜  
思已如隔世猶得附名集末亦厚幸云

海昌重修學宮存信錄跋

漢人於造作紀功之碑率錢而爲之者必書出錢人姓  
名及錢數於碑陰孔廟則若韓勅造禮器碑題名百有  
餘人是也後世存信錄實昉於此其自出奉錢若魯相  
史農祀孔子奏銘及饗廟後碑則無出錢人姓名然曰

以城池道濡麥還所斂民錢財則始未嘗不借力於眾人也借力於眾人既相勵而趨爲之而或工役之不勤出內之不慎鈎稽之不當其何以孚眾志而爲連墜之思歲丁亥泰吉初至海昌當陽湖憚侯修學落成之時迄今十有八年風雪摧壓不修且壞乃與學正金華董君長庚謁諸知州宛平許侯發和出錢爲倡興工於二十三年之秋唐太學元董其役陰陽家言方有宜忌且眾力難集未克畢工是歲之冬平越楊侯裕深來權州事乃率作興修新建陶棣生宗輝涪州周鷺汀廷振閩南羅勛庭汝修三巉尹雲南李琳園州判仙根銅山彭

事修吏目念祖偕諸紳士勸募有成乃鳩工於明年二月至八月而訖總其出內者泰吉及曹文學錦堂也都料工匠則蔣太學晉兪廣文漢陳少尹洽而董君暨郭文學蕙時省視之以克完固乃會計出入之數授之梓凡出錢者人藏一編後有興作可按籍稽也將以餘資續修志乘僉議謂然嘗考韓勅碑陰孔建壽既出錢千碑左側又書孔建壽二百蓋助錢造器與修廟爲二事也海昌士君子有樂爲孔建壽者當續錄焉道光二十四年歲次甲辰十有二月既望

節孝錄跋

蔣生寅昉用前人忠貞錄忠烈編旌孝錄之例彙萃其兼祧母徐太安人傳誌哀輓之詞爲節孝錄將授之梓同人多兼美寅昉之孝寅昉憫然不自安余曰旣美其所稱又美其所爲古義也先儒鄭氏釋銘者自名之義謂稱揚其先祖之德著己名於下也夫顯揚先祖以自成其名古之孝子未嘗敢辭也寅昉讀是編而思所以自成其名必將終其身守徐安人之教以實副其名則亦終其身不失安人之令名矣禮云幸哉有子如此獎勸之義備焉寅昉何疑焉

甘泉鄉人稿卷十三